

Årsmelding 2013

Arrangement

Historielaget har hatt fleire foredrag / kveldsseto i Jutulheimen. Jakup Skjedsvoll hadde foredrag om kjeldebruk i slektsgransking og lokalhistorie med bl.a. skifte, skatt og panteregister. Det var 75 år sidan flaumen i 1938, dette vart markert på årsmøtet med radioopptak frå den gongen med bl.a. intervju med fleire vagverar. Unn Bostad tok for seg historikk om Prestgarden og Prestgardshagen. Det vart arrangert fotokveld der innsamla gamle foto vart vist på storskjerm.

Vegard Veierød hadde tre kulturhistoriske vandringar i Bøneslia og ved Flokka og Mela. Historielaget hadde saman med Margit Hoen som leiger Pulløybua markering på Pulløya av at bua var 200 år. Det vart fortald om historia til bua og om Gullbrand Snerle som bygde ho. Torvstrøhuset ved Sandranden vart ferdig, Langmorkje Almenning og Vågå fjellstyre har støtta dette tiltaket. Huset vart opna i oktober, det vart da fortald om torvstrøhistoria.

Jutulheimen

Historielaget hadde stor utstilling i Jutulheimen med maleri, teikningar mm. av Trygve Haakenstad i samband med at det var 100 år sidan han vart fødd, Ola Grøslund innleia med foredrag om Haakenstad. Elles er det Gudbrandsdalsmusea as som står for drifta av Jutulheimen. Dei hadde utstilling og foredrag om Sjørdalstrioen og ei minnebokutstilling, medan Johan Storm Munch heldt foredrag om Edvard Munch og Vågå. Vågå Historielag er aksjeeigar i Gudbrandsdalsmusea as og har nå fått ein representant i styret. Historielaget er aktivt med i planleggjing og drøfting av vedlikehald, drift og utstillingar, fokus siste tida har vore behovet for gjenstandsregistrering og magasin. Historielaget har fått gåve frå Lions Club Vågå til uteanlegget i Jutulheimen.

Prestgarden

Paktarbustaden er bortleigd som bustad medan låven, aurbua og del av fjøset er bortleigd som lager. Kunstnaren som bur i paktarbustaden leiger Studeren til sine aktivitetar. Delar av hovudbygningen er utleigd til Dagsenteret og husflidslaget. Husflidslaget har stor aktivitet der, og har også hatt fleire opne arrangement. Under Vågå-dågå var det forskjellige utstillingar i Ullinsvin, og bygdakvinnelaget baka i eldhuset. Golva i peisstugu og på kjøkkenet er slipte og lakka. Det er innkjøpt oppvaskmaskin og ein del mindre utstyr. Toalettet i fyrste etasjen er sett i stand att, og gamle panelomnar i stugu er utskifta. Det er i stand ny el. installasjon i stabburet. Låven er rydda og har vore brukt til enkelte bildeutstillingar, det er installert ljøs for dette.

Pipene og eldstadane i hovudbygningen og Studeren er stelt slik at dei er lovlege å bruke, Stiftelsen UNI har gjeve støtte til dette. Svala på Studeren er restaurert, og arbeidet med eldhuset er fullført. Panelen på taket på lysthuset er utskifta. Norsk kulturminnefond og Oppland fylkeskommune har gjeve støtte til desse tiltaka på freda bygningar, gåva frå sveitsisk Norgesvenn har stått for reisten av finansieringa.

Prestgardshågein

Hagegruppa i historielaget har fullført restaureringa av hagen. Hellegangar, grusgangar, sitjeplassar, rosebed, fjellbed og staudebed er på plass. Nytt flettverksgjerde nedantil er ferdig. Det er tilskot frå riksantikvaren som har finansiert dette. Det er organisert ei gruppe som har ansvar for stell, luking, vatning mm., det er fordelt ansvar for kvar veke. Også plenklipping samt raking og rydding både i hagen og på tunet er utført på dugnad. Avduking av byste av Edvard Munch under Vågå-dågå fungerte også som ein presentasjon av den nyrestaurerte Prestgardshågein. Seinare har det vore mykje besøk i hagen, og i desember var det fakkeltog, kransenedleggjing og kunstutstilling i samband med 150-årsdagen til Edvard Munch. Unn og Birger Bostad fekk kulturprisen for Vågå, og innsatsen med Prestgardshågein er ein del av grunngevinga for tildelinga.

Laget ellers

*Frå årsmøtet 8. mars 2013 har styre vore dette:
Knut Raastad styreleiar, Dag Aasheim nestleiar
Reidun Sønstelien, Håkon Ulsand og Arne Strand styremedlemmar
Bjula Ulsetten, Even Luseter og Jonny Brenden varamedlemmar
Det har i året vore sju styremøter, og varamedlemmane møter på lik line med styremedlemmane. Laget har 410 medlemmar.*

God oppslutning om frivillig medlemskontingent gjer utgjeving av årsskriftet Jutulen mogleg med utsending til alle medlemmane, i tillegg er heftet utlagt for salg. Historielaget kostar pynting av gravene til Ivar Kleiven, Trond Eklestuen og Jo Gjende. Innsamla gamle bilete blir utlagt på heimesida vaagaa-historielag.org. Historielaget har som gåve fått attverande kapital frå Vågå Frørenseri. Ola Grøslund har spelt over gamle lydbandopptak til digital harddisk, dette er opptak av intervju med eldre folk som historielaget har gjort i tidlegare tider. Pulløybua er bortleigd som anneks til nabohytta. Nordheradsprosjektet disponerer Flåten.

Det vart invitert til befaring og visning av buene ved Gjendeosen i samband med Bessegløpet. Seinare har det vore registrering av behov for vedlikehald. Studioet er rydda og reingjort for støv. Det er frågrave torv frå døra til studioet, dette er brukt på taket av Klonesbua til å dekkje der platon-pappen låg fri. Eit utskore skap i Klonesbua er reparert. Buene vil kunne lånast ut til historielagsmedlemmar.

Styret takkar samarbeidspartar og medlemmar i laget for god hjelp og støtte i året 2013.